



**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKO VIJEĆE**

Broj: 01-02-1-2669\_\_/13

Datum: \_\_.2013. godine

**NACRT**

Na osnovu člana 13. Zakona o pripadnosti javnih prihoda u Federaciji Bosne i Hercegovine ("Službene novine Federacije BiH", broj: 22/06 i 22/09), člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH" broj 49/06) i člana 14. Statuta Općine Tešanj ("Službeni glasnik Općine Tešanj" broj 11/07) Općinsko vijeće Tešanj na svojoj \_\_sjednici održanoj dana \_\_.2013.godine donosi

**O D L U K U**

**o općinskim administrativnim taksama i naknadama**

**I - OPĆE ODREDBE**

**Član 1.**

Za spise i radnje u upravnim stvarima kao i za druge predmete i radnje (u daljem tekstu: spisi i radnje), ako Zakonom i ovom Odlukom nije drugačije regulisano plaćaju se administrativne takse i naknade kod: općinskih organa uprave, preduzeća, ustanova i drugih pravnih lica kojima je povjereno vršenje određenih upravnih i stručnih poslova iz djelokruga organa uprave, odnosno institucija kojima je povjereno vršenje javnih ovlaštenja kad rješavaju u upravnim stvarima o određenim pravima i obavezama.

**Član 2.**

Spisi i radnje za koje se plaća taksa kao i visina takse utvrđuju se taksenom Tarifnikom koji je sastavni dio ove Odluke.

**Član 3.**

Spisi i radnje u postupcima koji se vode po službenoj dužnosti ne podliježu plaćanju takse i naknade.

**Član 4.**

Obaveza nastaje:

- za podneske – kada se predaju, a za podneske predate na zapisnik – kada je zapisnik sastavljen,
- za rješenje i druge isprave – u trenutku podnošenja zahtjeva za njihovo izdavanje,
- za pravne radnje – podnošenjem zahtjeva za izvršenje tih radnji.

**Član 5.**

Ako je podnesak za koji taksa ili naknada nije plaćena ili je nedovoljno plaćena stigao poštom, organ nadležan za odlučivanje po podnesku pozvaće obveznika opomenom da u roku od 8 dana od dana prijema opomene plati redovnu taksu ili naknadu kao i taksu za opomenu.

U slučaju da nije postupljeno u skladu sa stavom 1. postupak će biti obustavljen, shodno odredbama Zakona o upravnom postupku.

**Član 6.**

Općinske administrativne takse se plaćaju taksenim markama

Taksene marke će se štampati u apoenima od 1KM, 2KM, 5KM i 10KM. Distribucija i prodaja taksenih maraka vršit će se posredstvom ovlaštenih distributera.

Do emitiranja taksenih maraka, takse će se plaćati u gotovom novcu na blagajni Općine ili uplatom na depozitni račun Općine putem banke.

Takse iznad 50,00 KM i sve naknade plaćat će se u gotovom novcu na blagajni Općine ili na depozitni račun putem banke.

## **II - OSLOBAĐANJE OD PLAĆANJA TAKSI**

### **Član 7.**

Od plaćanja taksi oslobođeni su:

1. Bosna i Hercegovina, Federacija BiH, kantoni, jedinice lokalne samouprave i njihovi organi i mjesne zajednice na osnovu pismenog akta,
2. Korisnici redovne socijalne pomoći Centra za socijalni rad na osnovu rješenja ili odgovarajuće potvrde Centra,
3. Organizacije i savezi osnovani za zaštitu lica sa fizičkim i psihičkim nedostacima i poremećajima, humanitarne i dobrotvorne organizacije, savezi i organizacije RVI, organizacije porodica šehida i poginulih boraca, jedinstvena organizacija boraca za spise i radnje u vezi s vršenjem djelatnosti, uz priloženo rješenje, uvjerenje ili drugi dokaz izdat od nadležnog organa,
4. Javne ustanove u oblasti odgoja i obrazovanja, znanosti, kulture, zaštite kulturne i privredne baštine, zdravstva, socijalne zaštite i vjerske zajednice za potrebe obavljanja svoje djelatnosti.

Od plaćanja taksi iz Tarifnika broj 1. tačka 10. (ovjera dokumentacije) oslobođeni su:

1. Nezaposlene osobe u postupku prijavljivanja na konkurse za zasnivanje radnog odnosa, uz priložen dokaz da su prijavljeni na Zavod za zapošljavanje općine Tešanj,
2. Učenici i redovni studenti u svrhu školovanja, uz priloženu kopiju đlačke knjižice, indexa ili uvjerenja,
3. Penzioneri sa najnižom penzijom, uz priložen ček od penzije.

Od plaćanja taksi iz Tarifnika broj 1. tačka 1. (izvodi matičnog ureda) i Tarifnika broj 4. tačke 6, 16. i 51. (urbanistička, građevinska dozvola i legalizacija za stambene objekte) oslobođeni su:

1. Dobitnik ratnog priznanja ili odlikovanja, ratni vojni invalid, nezaposleni demobilisani borac, član uže porodice šehida, poginulog, umrlog ili nestalog borca, uz priloženo rješenje, uvjerenje ili drugi dokaz izdat od nadležnog organa,
2. Invalidne osobe preko 60 % invalidnosti, uz priloženo rješenje, uvjerenje ili drugi dokaz izdat od nadležnog organa.

"dobitnik ratnog priznanja ili odlikovanja", "ratni vojni invalid", "član porodice šehida, poginulog, umrlog, nestalog branioca", "član uže porodice poginulog, umrlog ili nestalog dobitnika ratnog priznanja ili odlikovanja", "demobilizirani branilac", "dijete demobiliziranog branioca" i "dijete ratnog vojnog invalida" upotrijebljeni su u skladu sa odredbama Zakona o dopunskim pravima branilaca i članova njihovih porodica ("Službene novine ZE-DO kantona" broj 6/06, 9/07 i 18/12)

Članom uže porodice šehida, poginulih boraca smatraju se maloljetna djeca i djeca do navršanih 25 godina starosti koji se nalaze na redovnom školovanju, bračni drug i roditelj šehida, poginulog borca.

### **Član 8.**

Obveznik je lice po čijem prijedlogu ili u čijem interesu se preduzimaju radnje propisane ovom Odlukom. Ako za istu taksu postoje dva ili više obveznika, njihova obaveza je solidarna.

Kad je postupak pokrenut na zahtjev više lica od kojih su neka oslobođena od plaćanja takse, taksu u tom postupku plaća građanin koji nije oslobođen plaćanja takse.

### **Član 9.**

Oslobođeni su od plaćanja taksi sljedeći spisi i radnje:

1. u postupku povrata nepravilno naplaćenih sredstava,
2. u postupku za upis u knjigu državljana, prijave i upisa u matične knjige po službenoj dužnosti,
3. u postupku za ispravljanje grešaka u rješenjima, drugim ispravama i službenim evidencijama,
4. u vezi sa civilnom zaštitom,
5. u postupku za sahranu umrlih lica,
6. u vezi sa zaštitom spomenika kulture i prirode,
7. u postupku utvrđivanja penzijsko-invalidskog i zdravstvenog osiguranja.

#### **Član 10.**

Oslobađanja predviđena u članu 7. i članu 9. Odluke ne odnose se na radnje plaćanja takse obuhvaćene tarifnikom broj 4. od rednog broja 32. do 41.

Slučajevi oslobađanje od plaćanja taksi ne odnose se na oslobađanja od plaćanja naknada.

#### **Član 11.**

U ispravama koje su oslobođene od plaćanja takse mora se označiti u kom se cilju izdaju i osnov za oslobađanje od plaćanja.

Isprave iz stava 1. ovog člana mogu se upotrijebiti i u druge svrhe samo kad za njih bude plaćena odgovarajuća taksa.

#### **Član 12.**

Za korištenje podataka i vršenje usluga u oblasti, premjera zemljišta, katastra nekretnina i katastra komunalnih uređaja, propisane su posebne naknade i za iste se ne mogu naplaćivati općinske administrativne takse.

#### **Član 13.**

Strani državljani pod uvjetima reciprociteta imaju ista prava po propisima o taksama i naknadama kao i državljani Bosne i Hercegovine.

### **III - NADZOR NAPLATE I POVRAT TAKSE**

#### **Član 14.**

Lice koje je platilo taksu, a koju nije bilo dužno da plati ili je platilo taksu u iznosu većem od propisanog, kao i lice koje je platilo taksu a radnja za koju je platilo taksu iz bilo kojih razloga nije izvršena, ima pravo na povrat takse.

Postupak za povrat takse pokreće se po zahtjevu stranke, a u pojedinim slučajevima i po službenoj dunosti.

Rješenje o povratu takse donosi organ kome je taksa plaćena, a povrat takse vrši se na teret prihoda budžeta Općine.

#### **Član 15.**

Pravo na naplatu takse zastarijeva za dvije godine nakon isteka godine u kojoj je taksu trebalo naplatiti, a pravo na povrat takse zastarijeva za dvije godine nakon isteka godine u kojoj je taksa naplaćena.

Vrijeme zastarijevanja prava na naplatu takse prekida se svakom službenom radnjom nadležnog tijela izvršenom kod naplate koja je stavljena do znanja taksenom obvezniku.

Vrijeme zastarijevanja prava na povrat takse prekida se svakom radnjom taksenog obveznika poduzetom kod nadležnog tijela radi povrata takse.

#### **Član 16.**

Kontrolu i nadzor nad primjenom ove odluke vrše službe Općine Tešanj, svaka iz svoje nadležnosti.

### **IV - PRELAZNE I ZAVRŠNE ODREDBE**

#### **Član 17.**

Stupanjem na snagu ove Odluke, prestaje da važi Odluka o općinskim administrativnim taksama ("Službeni glasnik Općine Tešanj" broj 3/11 i 6/12).

#### **Član 18.**

Sastavni dio ove Odluke je Tarifnik općinskih administrativnih taksi i naknada.

#### **Član 19.**

Ova Odluka stupa na snagu narednog dana od dana objavljivanja u "Službenom glasniku Općine Tešanj".

**PREDSJEDAVAJUĆI OV**  
**Fuad Šišić, dipl. ing. maš.**

## OBRAZLOŽENJE

### PRAVNI OSNOV

- član 13. Zakona o pripadnosti javnih prihoda u Federaciji Bosne i Hercegovine ("Službene novine Federacije BiH", broj 22/06 i 22/09),
- član 13. Zakona o principima lokalne samouprave u Federaciji Bosne i Hercegovine ("Službene novine Federacije BiH" broj 49/06) i
- član 14. Statuta Općine Tešanj ("Službeni glasnik Općine Tešanj" broj 11/07).

### RAZLOZI ZA DONOŠENJE

Općinski načelnik je Rješenjem broj 08-02-1-2669/13 od 08.10.2013. godine formirao Komisiju za analizu efekata Odluke o administrativnim taksama. Nakon izvještaja Komisije i dodane analize menadžment tima Općine odlučeno je da se Vijeću dostavi nacrt Odluke.

Neki od razloga za pripremu nove odluke su:

Veća nabavna cijena obrazaca za izvode matičnih ureda (sa 0,06 na 0,40 KM) i nabavna cijena matičnih knjiga (cijena uvećana 2 puta)

Na osnovu navedenih razloga ukazana je potreba za usklađivanjem i revizijom kategorija koje su oslobođene od plaćanja taksi, te je smanjen broj kategorija koje su izuzete od oslobađanja taksi za izvode iz matičnih ureda.

Problemi koji su utvrđeni na terenu oko sanacije raskopavanja javnih površine i puteva, kao i privremeno zauzimanje javnih površina.

Zbog navedenog predloženo je povećanje iznosa taksi uz uvođenja dodatnih taksi sa obzirom na vrijeme trajanja zauzimanja javnih površina i dužine raskopavanja.

Nacrtom Odluke izvršeno je izjednačavanje određenih taksi (trgovačka djelatnosti i obrta) izjednačavanje visine takse za uslugu u Općini i drugim institucijama, a pored toga povećane su uvedene takse kod onih slučajeva gdje su povećani troškovi zbog prekovremenog rada i prijevoza uposlenika, materijala i slično (prilog pregled povećanja i uvođenja novih taksi).

Na osnovu svega navedenog predlažemo Općinskom vijeću usvajanje nacrtu Odluke i provođenja javne rasprave u trajanju od 15 dana, nakon čega će Vijeću biti ponuđen prijedlog Odluke i izvještaj sa javne rasprave.

### Dostavljeno:

1. Općinsko vijeće
2. Arhiva

### OBRAĐIVAČ

Sužba za boračko-invalidsku  
zaštitu i opću upravu  
VD pomoćnik općinskog načelnika  
Nerminka Handžić, dipl. pravnik

### PREDLAGAČ

OPĆINSKI NAČELNIK  
Mr.sci. Suad Huskić, profesor

**Broj: 02-02-1-2669-2/13**

**Datum: 16.11.2013. godine**